

Mahathir: Saya ingatkan Zulkipli calon terbaik
Malaysiakini.com
March 14, 2007
Muda Mohd Noor

Bekas Perdana Menteri, Tun Dr Mahathir Mohamad berkata beliau bertanggapan Datuk Seri Zulkipli Mat Noor adalah seorang yang bersih dan calon paling sesuai ketika melantiknya mengetuai Badan Pencegah Rasuah (BPR).

Dr Mahathir memberi reaksi tersebut apabila ditanya mengapa beliau melantik Zulkipli menjadi Ketua Pengarah BPR pada 2001.

Dr Mahathir berkata beliau juga tidak mengenali Zulkipli secara peribadi, dan menambah bahawa "apa yang saya tahu beliau adalah ketua polis Sabah atau Sarawak."

Zulkipli kini berdepan dengan dakwaan rasuah dan salahlaku seksual yang dibuat oleh bekas pegawai kanan BPR, Mohamad Ramli Abdul Manan.

Dr Mahathir juga telah melanjutkan kontrak perkhidmatan Zulkipli selama setahun pada 2004. Selepas itu, Perdana Menteri sekarang melanjutkan perkhidmatan Zulkipli sebanyak dua kali.

Dalam laporannya kepada beberapa pihak, termasuk Ketua Polis Negara sebelum ini, Tan Sri Bakri Omar, Ramli mendakwa mempunyai bukti terhadap Zulkipli.

Ramli mendakwa telah ditukar dari Sabah balik ke ibupejabat BPR di Putrajaya dan 'dibekukan' sehinggalah dia bersara.

Dr Mahathir bercakap dalam satu sidang akhbar di pejabatnya di Putrajaya petang ini selepas menyampaikan sijil kepada ahli kehormat Dewan Perniagaan Melayu Malaysia Kuala Lumpur (DPMMKL).

Dakwaan rasuah

Antara penerimanya ialah Tan Sri Ramon Navaratnam, Tan Sri Dr Lim Kok Wing, Datuk Mukhriz Tun Dr Mahathir dan Datuk Dr Michael Yeoh dan Datuk Dr Ahmad Nawab.

Ditanya mengenai dakwaan rasuah terhadap Timbalan Menteri Keselamatan Dalam Negeri, Datuk Mohd Johari Baharom, Dr Mahathir, dengan sinis berkata:

"Saya sangat yakin beliau seorang yang sangat bersih. Selepas siasatan dia tetap bersih," katanya.

Johari didakwa menerima RM5.5 juta untuk membebaskan tiga lelaki yang ditahan di bawah Ordinan Darurat.

Mengenai dakwaan bekas pegawai kanan Badan Pencegah Rasuah (BPR), Mohamad Ramli Abdul Manan bahawa beliau (Dr Mahathir) telah menghalang agensi itu daripada bekas menteri kabinet, Tan Sri Kasitah Gaddam, bekas Perdana Menteri itu berkata:

"Bagaimana dia (bekas Pengarah BPR, Mohamad Ramli Abdul Manan) tahu saya

menghalang siasatan, saya tidak tahu”.

Dr Mahathir berkata, beliau tahu nama orang yang disiasat berdasarkan laporan yang dihantar kepada beliau oleh BPR.

“Semasa saya (berkhidmat), banyak aduan mengenai rasuah yang diterima dan banyaklah tindakan yang diambil,” katanya.

Copyright © 1999-2007 Mkini Dotcom Sdn. Bhd.

Source : <http://www.malaysiakini.com/news/64514>